

第三四九册

明倫彙編

氏族典

(卷)

枚雷姓部

一〇六

崔姓部

一〇九—一二三

來萊臺

開姓部

一二四

台邵

哀回槐檣魁

杯檣

哈才材顏靄

孩姓

數哉諸姓部

一二五

眞甄姓部

一二六

陳姓部

一二七—一二三

古今圖書集成

中華書局影印



古今圖書集成

卷一百一十五

欽定古今圖書集成明倫彙編氏族典

第一百八卷目錄

枚姓部彙考

鄭樵通志 平聲

王應麟姓氏急就篇 枚氏

枚姓部列傳

周

枚被

枚產

漢

枚乘

枚舉

枚赫

枚根

明

枚倫

枚應發

雷姓部彙考

鄭樵通志 以國爲氏

廖用賢尚友錄 雷姓

雷姓部列傳

上古

雷公

漢

雷被

後漢

雷義

雷緒

吳

雷譚

晉

雷煥 子華

雷弱兒

宋

雷次宗

雷肅之

北魏

雷紹

唐

雷萬春

雷滿

雷彥威

後梁

雷彥恭

宋

雷德驥

雷有終

雷有鄰

雷孝先

雷允恭

雷簡夫

雷德遜

雷協

雷平

雷觀

雷霄

雷威

雷度

雷宣微

雷應春

雷說

雷孝友

雷潔

雷宜中

雷三益

雷龍濟

金

雷思

雷淵

元

雷膺

雷杭

雷光蓮

雷添祥

明

雷亮

雷誠

雷境

雷填

雷吉生

雷鉞

雷潛

雷燦

雷復

雷浩

雷澤

雷仕旃

雷宗

雷應龍

雷瑄

雷應通

雷禮

雷達

雷賀

雷夢麟

雷以仁

雷鳴春

雷鳴陽

雷金科

雷龍

雷令

雷芳

雷叔開

雷楚佐

雷續祚

雷綿祚

雷膺祚

雷鼓英

雷應乾

雷杲

雷起東

雷作敏

雷轟

雷貴

雷姓部紀事

氏族典第一百八卷

枚姓部彙考

鄭樵通志

平聲

枚氏六國時賢人枚被漢弘農太守枚乘望出淮陰王應麟姓氏急就篇

枚氏

枚氏蓋以銜枚氏得姓

枚姓部列傳

周

枚被

按鄭樵通志六國時賢人枚被

枚產

按姓氏急就篇魏有枚產

漢

枚乘

按漢書枚乘傳乘字叔淮陰人為吳王濞郎中吳王謀逆乘諫不納去之梁從孝王游吳王禽滅乘由是知名景帝召拜乘弘農都尉不樂郡吏以病去官復游梁梁客皆善屬辭賦乘尤高孝王薨歸淮陰武帝即位以安車蒲輪徵乘道死

枚阜

按漢書枚乘傳乘字阜字少孺乘在梁取阜母為小妻乘東歸不肯隨乘怒分阜數千錢留與母居阜年十七上書梁共王得召為郎見譏遇罪家室沒入阜亡至長安上書自陳枚乘之子上大喜召見詔使

賦平樂館善之拜為郎使匈奴阜諷笑好嬉戲為文疾受詔輒成故所賦者多司馬相如善為文而遲故所作少而善於阜

枚赫

按萬姓統譜赫江都人淮南王客

枚根

按萬姓統譜根越備太守

明

枚倫

按萬姓統譜倫字彥常正統間刑部主事乞歸養久為郎官雍容而已無躁競心時皆賢之陞湖廣參議

枚應發

按吳縣志應發居閭門市母病醫藥勿療刳股和羹以進母疾已他日母復危甚應發北面稽首叩天願減己年益母是夕陰暝俄頃雲開北斗星見惟一星尚沒及還見母擁衣坐言有白衣者六人以水灌灑遂霍然起

雷姓部彙考

鄭樵通志

以國為氏夏商以前周

雷氏方雷氏之後女為黃帝妃生元枵蓋古諸侯之國後漢有雷義又有雷次宗蜀有將軍雷同吳陸抗傳有宜都太守雷譚

廖用賢尚友錄

雷姓

雷馮翊商音又望出豫章

雷姓部列傳

上古

雷公

按劉恕外紀黃帝命岐伯雷公察明堂究息脈

漢

雷被

按漢書淮南王傳淮南王安謀為反具后荼太子遷及女陵擅國權奪民田宅妄致繫人太子學用劍自以為人莫及聞郎中雷被巧名與戲被壹再辭讓誤中太子太子怒被恐此時有欲從軍者輒詣長安被即願奮擊匈奴太子數惡被王使郎中令斥免欲以禁後元朔五年被遂亡之長安上書自明事下廷尉河南河南治逮淮南太子

後漢

雷義

按後漢書雷義傳義字仲公豫章郡陽人初為郡功曹嘗擢舉善人不伐其功義嘗濟人死罪罪者後以金二斤謝之義不受後舉孝廉拜尚書侍郎有同時郎坐事當居刑作義默自表取其罪以此論司寇同臺郎覺之委位自上乞贖義罪順帝詔皆除刑義歸舉茂才讓於陳重刺史不聽義遂伴狂被髮走不應命鄉里為之語曰膠漆自謂堅不如雷與陳三府同時俱辟二人義遂為守灌謁者使持節督郡國行風俗旋拜侍御史除南頓令卒官

雷授

按後漢書雷義傳義子授官至蒼梧太守

雷緒

按姓氏急就篇漢有雷緒

雷同

按鄭樵通志蜀有將軍雷同

吳

雷譚

按吳志陸遜傳遜子抗拜都督信陵西陵夷道樂鄉公安諸軍事鳳皇元年西陵督步闡據城以叛諸將咸欲攻闡抗每不許宜都太守雷譚言至懇切抗欲服衆聽令一攻攻果無利

晉

雷煥子華

按晉書張華傳初吳之未滅也斗牛之間常有紫氣道術者皆以吳方強盛未可圖也惟華以爲不然及吳平之後紫氣愈明華聞豫章人雷煥妙達緯象乃要煥宿屏人曰可共尋天文知將來吉凶因登樓仰觀煥曰僕察之久矣惟斗牛之間頗有異氣華曰是何祥也煥曰寶劍之精上徹於天耳華曰君言得之吾少時有相者言吾出六十位登三事當得寶劍佩之斯言豈效與因問曰在何郡煥曰在豫章豐城華曰欲屈君爲宰密共尋之可乎煥許之華大喜即補煥爲豐城令煥到縣掘獄屋基入地四丈餘得一石函光氣非常中有雙劍並刻題一曰龍泉一曰太阿其夕斗牛間氣不復見焉煥以南昌西山北巖下土以拭劍光芒豔發大盆盛水置劍其上視之者精芒炫目遣使送一劍并土與華雷一自佩或謂煥曰得兩送一張公豈可欺乎煥曰本朝將亂張公當受其禍此劍當繫徐君墓樹耳靈異之物終當化去不永

爲人服也華得寶劍愛之常置座側華以南昌土不致煥煥更以拭劍倍益精明華誅失劍所在煥卒子華爲州從事持劍行經延平津劍忽於腰間躍出墮水使人沒水取之不見劍但見兩龍長數丈蟠紫有文章沒者懼而反須臾光彩照水波浪驚沸於是失劍華嘆曰先君化去之言張公終合之論此其驗乎

雷弱兒

按前秦錄弱兒南安羌酋也洪稱秦王以弱兒爲輔國將軍健嗣位以弱兒爲太尉俄遷大司馬初晉揚州刺史殷浩陰遣人誘弱兒等使殺秦王健許以關右之任弱兒僞許之且請兵應接浩聞張遇作亂健兄子輔國將軍黃眉自洛陽西奔以爲弱兒等事已成遂自壽春率衆七萬北伐欲進據洛陽修復園陵吏部尚書王彪之上會稽王昱箋以爲弱兒等容有詐謀未應輕進不從浩遂爲姚襄所襲走保譙城襄浩相持秦人遂收漁人之利弱兒之計也其後桓溫來伐健遣太子萇帥雄萇等拒之戰於藍田爲溫所敗溫進次潁上萇等退屯城南健悉發精兵三萬遣弱兒與萇合兵拒之溫不得前師還乏食僅入潼關健實拒溫之功以弱兒爲丞相及健寢疾受遺輔政弱兒性剛鯁好直諫以生嬖臣趙韶董榮奸佞亂政每公言於朝見之常切齒韶榮恨之譖之於生遂殺之并其九子二十七孫弱兒推誠苻氏年高有功生既殺之於是諸羌皆有離心叛者相繼

宋

雷次宗

按宋書雷次宗傳次宗字仲倫豫章南昌人少入廬山事沙門釋慧遠篤志好學尤明三禮毛詩隱退不交世務本州辟從事員外散騎侍郎徵並不就元嘉十五年徵次宗至京師開館於雞籠山聚徒教授車駕數幸次宗學館資給甚厚又除給事中不就久之還廬山二十五年詔加散騎侍郎後又徵詣京邑爲築室於鍾山西巖下謂之招隱館使爲皇太子諸王講喪服經次宗不入公門乃使自華林東門入延賢堂就業二十五年卒於鍾山時年六十三

雷肅之

按宋書雷次宗傳次宗子肅之頗傳其業官至豫章郡丞

北魏

雷紹

按姓氏急就篇後魏有雷紹

唐

雷萬春

按唐書張巡傳雷萬春者不詳所來事巡爲偏將令狐潮圍雍丘萬春立城上與潮語伏弩發六矢著面萬春不動潮疑刻木人謀得其實乃大驚潮壁雍丘北謀襲襄邑寧陵巡使萬春引騎壓潮先爲賊所包巡突其圍大破賊潮遁去萬春彊毅用命每戰巡任之後死巡難

雷滿

按五代史雷滿傳滿武陵人也爲人兇悍驍勇文身斷髮唐廣明中湖南飢盜賊起滿聚諸蠻號土團軍

推滿爲帥是時高駢鎮荆南召滿隸麾下駢徙淮南滿從至廣陵逃歸遂據朗州請命於唐昭宗以禮朗爲武貞軍拜滿節度使時溪洞諸蠻起兵剽掠湖外滿亦以輕舟上下荆江攻劫州縣天祐中卒

雷彥威

按唐書鄧處訥傳雷滿卒子彥威自立開荆南節度使成納兵出襲江陵入之焚樓船殘墟落數千里無人跡弟彥恭結忠義節度趙匡疑以逐彥威據江陵匡疑弟匡明擊之還走朗州

後梁

雷彥恭

按五代史雷滿傳滿子彥恭嘗攻劫爲荆湖患開平元年馬殷發兵攻彥恭三年彥恭奔於楊行密馬殷擒其弟彥雄等十人送於梁斬於汴市彥恭卒於淮南禮朗遂入於楚

宋

雷德驥

按宋史雷德驥傳德驥字善行同州郃陽人周廣順三年舉進士解褐磁州軍事判官召爲右拾遺充三司判官宋初拜殿中侍御史改屯田員外郎判大理寺其官屬附會宰相趙普擅增刑名因求見白其事辭氣俱厲帝怒黜爲商州司戶參軍至郡爲文誦上削籍徙靈武數年其子有鄰擊登聞鼓訴中書不法事趙普由是出鎮河陽召德驥爲祕書丞俄分判御史臺三院事又兼判吏部南曹開寶七年同知貢舉太祖崩以德驥爲吳越國告哀使還遷戶部員外郎兼御史知雜事改職方員外郎充陝西河北轉運使

歷禮部郎中入爲度支判官太平興國四年車駕征太原爲太原西路轉運使六年同知京朝官考課俄遷兵部郎中七年以公累降本曹員外郎出知懷州未幾復舊官又命爲兩浙轉運使俄遷右諫議大夫雍熙二年徵歸朝同知京朝官考課端拱初遷戶部侍郎會趙普再入相德驥上疏乞歸田里太宗召見安諭之罷知考課止以本官奉朝請淳化二年爲其壻如京副使衛濯訟有鄰子祕書省校書郎孝先內亂德驥坐失教責授感德軍行軍司馬因慚憤成疾卒

雷有終

按宋史雷德驥傳德驥子有終字道成幼聰敏以陰補漢州司戶參軍時侯防典選木彊難犯選人聽署於廷無敢譁者有終獨抗言願爲大郡治獄掾陟叱之有終不爲阻署萊蕪尉知監左拾遺劉祺以有終年少頗易之有終發其奸賊祺坐罪以有終代知監事太宗卽位聞其名亟詔爲大理寺丞會德驥任陝西轉運奏爲解州通判有終入奏鹽池利害改贊善大夫令還權知軍事省通判太平興國六年遷殿中丞知密州徙淮南轉運副使改太常博士雍熙中王師北征命爲蔚州飛狐路隨軍轉運使人爲鹽鐵判官歷戶部度支副使出知昇州淳化初就遷少府少監知廣州二年女弟壻衛濯訟其家法不謹有終坐親累責授衡州團練副使俄丁外艱起爲都官員外郎歷度支鹽鐵副使時以江南嶺外茶鹽價不一細民冒禁私販詔有終領江淮兩浙荆湖福建廣南路茶鹽制置使使還改工部郎中知大名府不踰月復

爲少府少監徙知江陵李順之亂王師西征命爲峽路隨軍轉運使同知兵馬事就拜右諫議大夫知益州俄兼同招安使賊平改知許州三年改給事中知并州眞宗嗣位加工部侍郎咸平二年代還知審刑院俄授戶部使三年益州奏至神衛戍卒以正旦竊發擁都虞候王均爲亂卽日拜有終瀘州觀察使知益州兼川峽兩路招安捉賊事賊既平有終加保信軍節度觀察留後四年有終代還命爲涇原儀渭鎮戎路都部署辭不拜改知未與軍府徙秦州景德初徙爲并代副都部署丁內艱起復契丹入寇上幸澶淵詔有終赴援威聲甚振就判并州召拜宣徽北院使檢校太保二年七月暴疾卒贈侍中錄其子孝若爲內殿崇班閤門祇候孝傑爲內殿崇班孝緒爲供奉官孝恭爲侍禁親族門客給事輩遷補者八人

雷有鄰

按陝西通志有鄰德驥子聞德驥坐削籍流靈武意普害之擊登聞鼓訟普上召德驥爲祕書省權有鄰爲祕書正字後贈尚書

雷孝先

按宋史雷德驥傳德驥孫孝先字子思有鄰子也舉進士試祕書省校書郎知天長縣以衛濯訟其內亂除籍配均州後復知宛丘縣加試大理評事契丹內寇眞宗幸大名孝先以部芻糧河北擢太常寺奉禮郎王均反益州隨季父有終進討改將作監丞累遷尚書屯田員外郎知興元府坐保任失實降通判華州徙知鄆州宰相寇準舉換內園使知貝州會慈州民張熙載詐稱契丹謀者部送京師樞密院按得幸

先所敢狀謫澤州都監利號三州改環慶路兵馬鈴轄知邠州踰年領昭州刺史為益州鈴轄再遷左藏庫使擢西上閣門使涇原路鈴轄兼知渭州復知邠州徙耀州以為領軍衛大將軍昭州刺史分司西京卒于簡夫

雷允恭

按宋史雷允恭傳允恭開封人初為黃門頗慧黠稍遷入內殿頭給事東官周懷政為天書允恭豫發其事懷政死擢內殿崇班遷承制再遷西京作坊使普州刺史入內侍省押班章獻后初臨政丁謂潛結允恭凡機密事令傳達禁中由是允恭勢橫中外山陵事起允恭請效力陵上乃以為山陵都監允恭馳至陵下司天監邢中和為允恭言今山陵上百步法宜子孫類汝州秦王墳允恭曰何不就中和曰恐下有石與水爾允恭曰上無他子若如秦王墳何不可允恭素貴橫人不敢違即改穿上穴入白其事章獻后意不然既而上穴果有石石盡水出允恭竟以是坐盜金寶賜死籍其家

雷簡夫

按宋史雷德驥傳德驥孫孝先孝先子簡夫字太簡隱居不仕康定中樞密使杜衍薦之名見以祕書省校書郎簽書秦州觀察判官公事既罷居長安自以處士起不復肯隨眾調官多為岐路求辟薦時三白渠久廢京兆府遂薦簡夫治渠事知坊州徙簡州用張方平薦知雅州既而辰州蠻酋彭仕義內寇命簡夫督諸將進兵仕義內附擢三司鹽鐵判官以疾知就同二州遷尚書職方員外郎卒錄其子爵臣為郊

社齋郎簡夫始起隱者出入乘牛冠鐵冠自號山長既仕自奉驕侈頓忘其舊里閭笑之

雷德遜

按萬姓統譜德遜深於易義王元之有詩上之云題詩野館光泉石講易新堂動鬼神

雷協

按寧化縣志協字彥一充貢上庠以易學知名登政和二年進士調上饒縣尉遷上由縣丞古田令終宣教郎興化軍教授

雷孚

按萬姓統譜孚字保信筠州人政和初登第宰宜春倅章貢居官清白年八十餘卒贈太子太師

雷觀

按尚友錄觀字人靖康間在太學上書言張邦昌不宜重相又云漢陳龜有言三辰不軌擢士為相四垂不恭拔卒為將此何等時而通遷貴臣耶其言激切士論避之

雷霄

按陳氏樂書斲製之妙蜀稱雷霄郭諒

雷威

按採蘭雜志雷威作琴不必皆桐遇大風雪中獨往峨眉酣飲著蓑笠入深松中聽其聲連延悠颺者伐以為琴妙過於桐

雷度

按萬姓統譜度字世則臨川人器識高遠研精於易鄉人為不義者愧曰世則得無知我乎

雷宣徽

按尚友錄宣徽字有終因讀史廢書流涕曰功名者貪夫之釣餌橫戈開邊仗劍討叛死生食息之不顧及其死也一棺戡身萬事都已悲夫

雷應春

按尚友錄應春字春伯郴人以詩擅名累官監察御史首疏時相繼忤權貴出知全州弗就歸隱北湖後知臨江軍安靜不擾嘗欲城新塗以備不虞當路阻之及己未之亂臨江倉卒無備人始服其先見所著有洞庭玉虹日邊盟鶴清江諸集

雷說

按萬姓統譜說淳化人知大寧監入戶汲泉強弱相陵說於穴傍創石池以豬之外設橫板二十竅承以修竹謂之笕簡人咸稱便

雷孝友

按萬姓統譜孝友字子乾道中以詞賦魁南省開禧末為御史中丞嘉定初除知樞密院事兼參知政事卒贈太師

雷淥

按萬姓統譜淥長沙人光宗時知宜章有善政民立祠祀之

雷宜中

按萬姓統譜宜中字宜叔豐城人淳祐七年進士第三人為賈似道記室以不合去經略廣東北還奏復吳潛官及濟郎封爵

雷三益

按清流縣志三益魁岸有勇略景炎初信國文天祥入汀開府集兵三益同丙戌庚三子應召父子英烈

皆卒於勤王

雷龍濟

按建安縣志龍濟字耕祿號師古鄉貢進士常舉義兵赴崖山圖復王室沒於萬石灘

金

雷思

按萬姓統譜思渾源人舉進士累官大理寺持法寬平後同知北京轉運使事嘗註易有易解

雷淵

按金史雷淵傳淵字希顏一字季默應州渾源人父思仕至同知北京轉運使淵庶出年最幼諸兄不齒父沒不能安於家乃發憤入太學登至寧元年詞賦進士甲科調涇州錄事坐高庭玉獄幾死後改東平尋遷東阿令轉徐州觀察判官與定末召為英王府文學兼記室參軍轉應奉翰林文字拜監察御史彈劾不避權貴出巡郡邑所至有威譽至蔡州杖殺五百人時號雷半千坐此為人所訟罷去久之起為太學博士南京轉運司戶籍判官遷翰林修撰一夕暴卒

元

雷膺

按元史雷膺傳膺字彥正渾源人父淵金監察御史膺生七歲而孤金末母侯氏挈膺北歸渾源膺篤志於學事母以孝聞太宗時丞相史天澤鎮真定辟為萬戶府掌書記世祖即位授膺大名路宜撫司員外郎中統二年為翰林修撰同知制誥兼國史院編修官五年調陝西西蜀四川按察使參議至元二年改

陝西五路轉運司諮議四年用兵於蜀佩金符參議左壁總帥府事師還陞承務郎同知恩州事憲府表薦其能遂入拜監察御史十一年加奉議大夫食河東山西道提刑按察司事以稱職聞十四年進朝列大夫山南湖北道提刑按察副使轉淮西北道提刑按察副使二十年遷行臺侍御史分司湖廣江西十二年母憂去官明年起復授中議大夫江南浙西道提刑按察使致仕歸老於山陽二十九年徵拜集賢學士成宗即位朝會上都進秩二品大德元年卒於京師贈通奉大夫追封馮翊郡公諡文穆子肇順德路總管府判官孫豫南陽府穰縣尹

雷杭

按萬姓統譜杭字彥舟建安人與兄机棋以易鳴於時嘗註周易註解行世時稱雷氏易舉浙江鄉試第一人授儒學提舉遷潮陽縣尹以死事贈奉訓大夫奉化州知州官其子煜為同知

雷光憲

按萬姓統譜光憲分寧人居教授學士程鉅夫詹天遊皆其徒也嘗註九經輯義五十卷史辨三十卷詩義指南十七卷至元間遣使徵拜未幾卒學者稱龍光先生

雷添祥

按清流縣志添祥至元間鄧克明寇邑添祥同父吉匿山中寇掠至會吉患喘賊聞執吉索財物無所得欲殺之添祥抱父號泣求以身代賊竟縱其父而殺之

明

雷亮

按萬姓統譜亮咸寧人以才學舉薦任湖廣按察使僉事有賢能之譽士林稱重

雷誠

按崇陽縣志誠字仲明以書中洪武庚午科終江都令

雷境

按萬姓統譜境字彥達建安人幼孤事母至孝究心典籍家貧至無自給裕如也未樂間以孝薦至京師固辭而歸鄉人從之受學者衆

雷填

按建安縣志填字原中進士授工科給事中糾劾無所避末樂二年奉命鎮守蘇常松三府撫綏兵民誅鋤奸慝未及一載封章凡四十上繼復命巡按廣西吏畏民懷諸蠻讐服所著有原中類稿

雷吉生

按建安縣志吉生字祐之末樂進士除監察御史巡按江西湖廣山東所在風裁凜然高煦將為不軌吉生廉得其事以聞尚書李慶任情恣肆吉生露章劾之出知交趾宣化縣後李慶事敗方擬召用而吉生已死

雷鏡

按建安縣志鏡字有融末樂進士選庶吉士授雲南道監察御史巡按雲南考察官員無少假貸奏戮內臣害政者一十九人時守帥驕蹇不法以厚利陷鏡分毫無所取守帥懼預遣人構之於京復命坐言語不正出知蕪湖縣都御史顧佐特薦鏡於朝陞浙江

按察僉事時處州草寇葉宗留竊發設計勦滅之勅
巡視浙江福建海道卒錢居官清勤所至有冰蘖聲

雷潛

按建安縣志潛字孔昭領宜德壬子鄉薦正統初授
武選主事遷屯田郎中土木扈從死於難贈奉議大
夫

雷燦

按建安縣志燦字景星領浙江鄉薦任泉州路途嶺
巡檢閩中亂起兵助王師死贈將仕郎上杭主簿官
其子

雷復

按明外史李侃傳雷復字景陽湖廣寧遠人正統初
進士由庶吉士歷官廣西副使成化初以大臣會薦
擢山東右布政使七年徵拜禮部右侍郎尋改右副
都御史巡撫山西繼李侃後端恪守法得軍民心卒
於官

雷浩

按華容縣志浩字士弘景泰癸酉鄉貢授池州府同
知池陽沿江洲渚多屬動戚家往往侵奪民地浩至
疏論魏國奴甚力奴許賂以金堅却不受九載卒

雷澤

按山西通志澤定襄人天順間進士除授刑科給事
中危言讜論抗直不避權貴上疏奏劾被杖幾死瘡
痊復諫一時暴橫斂跡官至工部侍郎以清慎著

雷仕旃

按建安縣志仕旃字元芳成化乙未進士自戶部郎
出為浙江僉事陞廣西副使浙江右叅政致仕

雷宗

按安慶府志宗字希會桐城人弘治間進士授知汝
陽縣綽有善政擢四川道監察御史正德時征霸州
劇賊奉命監諸軍風裁凜然以功見忌於同事誣之
被逮謫瀏陽典史轉知崞縣告休宗鯁直不阿廉潔
自立家居十餘年貞志甘貧士大夫咸推重焉

雷應龍

按雲南通志應龍字孟升弘治甲子舉孝廉第一正
德戊戌進士授莆田知縣條行八禁皆切時宜巨璫
督貢方物甚橫力折之至均徭平賦築堤堰毀淫祠
大愜民心為御史奉敕巡鹽兩淮因災異疏八事世
宗嘉納尋有中貴乞織造屢疏極論不報憤憤而卒

雷瑄

按清流縣志瑄字宗器邑廩生善養親志正德初寇
發居民驚竄瑄招集訓練城賴保全

雷應通

按明外史吳景傳正德中賊越百丈關將逼川東雷
應通嘉州人父子七人倡義拒賊死戰被執慷慨就
死

雷禮

按萬姓統譜禮字必進江西豐城人嘉靖壬辰進士
任吏部考功司主事歷浙江提學副使官至少傅太
子太傅工部尚書

雷達

按萬姓統譜達字時漸豐城人嘉靖辛丑進士歷布
政使

雷賀

按萬姓統譜賀字時雄豐城人嘉靖辛丑進士歷布
政使

雷夢麟

按萬姓統譜夢麟字伯仁江西進賢人嘉靖甲辰進
士任刑部主事恤刑江南著讀律瑣言歷山東按察
使

雷以仁

按荊州府志以仁彝陵人嘉靖己未進士歷陝西方
伯秉己不阿致政歸行李蕭然囊無餘物子五人衣
服粗給而已

雷鳴春

按安慶府志鳴春號龍舒少篤孝友博學嗜古登嘉
靖己未進士授湖廣孝感縣知縣清慎勤敏五年奏
最擢刑部轉工部出守南陽多治蹟陞右叅議謝政
歸

雷鳴陽

按貴州通志鳴陽未寧人嘉靖鄉舉少失怙事母篤
孝及母喪廬墓三年甘露降於宅樹後官至杭州府
丞卒

雷金科

按建安縣志金科字潤溪嘉靖癸丑進士任禮部儀
制司主事不附嚴嵩左遷監官尋擢浙江寧波府繕
城稽伍暇課藝序士民尸祝

雷龍

按陝西通志龍字雲從華昌衛指揮使技藝精勇過
人而風度瀟灑如儒生應對中節見者器之副總建
昌分守燕河以諛歸治兵使者大惜之言於寧夏撫

督僉公取爲中軍沙拜之役敵衆兵少僉公身在行間龍以精兵二千張兩翼衝擊之斬首四千餘級陞莊浪參將在河西累立戰功晉京州總兵明年掛征西將軍印鎮寧夏首功最多自是延綏急則改延綏上谷急則改上谷三鎮掛印功不賞晉都督同知受蟒玉召還同知右軍府事與一時名公李臨淮李于鑄諸君遊久之復佩平羌將軍印出鎮甘肅邊用戡寧以疾乞骸骨龍由衛使至大將東西歷地萬餘里大小遇敵百餘戰斬獲萬計先算後戰以故未曾一

雷令

按末州府志令字行甫號我洲弱冠領鄉薦任貴池諭轉懷寧令時有勢宦虐民令繩之致被勘論既白遂掛冠海剛峰上疏雷之有旨復任堅志不行母卒一慟幾絕越三日竟殞

雷芳

按安陸縣志芳字筠倩號陸海中萬曆庚子鄉試早歲工詩劉公紹恤呼爲小友刻有北遊草鴈字詩累官工部郎中

雷叔聞

按荊州府志叔聞字實先江陵人萬曆戊午科舉人歷官景東府同知致仕歸

雷楚佐

按末州府志楚佐號鼎鉉郡庠生也力學養母天啓丙寅母病垂危楚佐泣禱於文廟欲剖肝養羹以奉母方持刀跪剖忽昏仆於地有白煙罩之不移時母病良已自此母延壽三年

雷續祚

按明外史姜曰廣傳雷續祚太湖人崇禎三年舉於鄉十三年夏帝思破格用人特命舉人貢生就試教職者悉用爲部寺司屬推官知縣續祚得刑部主事十五年擢武德道兵備僉事十二月山東被兵續祚固守德州有詔獎勵乃疏劾督師范志完首輔周延儒尚書范景文論德方拱乾給事中朱徽沈引培袁彭年等疏入帝心動名續祚陛見抵京入對名志完拱乾贊前疏中語帝怒誅志完而令續祚還任初續祚入朝自謂得總憲及是頗沮喪忌之者亦多尋以憂去福王時朱統續劾曰廣因及之遂逮治明年二月給事中林有本劾續祚不孝不忠賜自盡

雷綿祚

按安慶府志綿祚太湖庠生崇禎丁丑爲流賊所執不屈死之

雷膺祚

按安慶府志膺祚太湖庠生嗜古篤學崇禎壬午城陷賊執之罵不絕口賊怒投入廩中焚之其子廷發痛父慘亡亦奮身烈焰中死

雷鼓英

按安陸縣志鼓英字四維崇禎庚午舉人癸未賊據郡城欲官之羅騎四出從間道走鄂值獻逆之變闔家赴水死

雷應乾

按荊州府志應乾號石山江陵人崇禎進士授內江知縣歷戶部主事擢知兗州府時苦旱饑殍盈路應乾獨俸賑濟民賴以安

雷果

按貴州通志果都勻人明經任浪穹知縣惠多及民民愛戴之爲立生祠

雷起東

按新寧縣志起東字初白天資淳朴博洽羣書以明經選廣西賀縣尹行取兵部職方司以丁內艱回籍百姓焚香遮道挽留不得爲立生祠祀之

雷作敏

按崇陽縣志作敏字正務令彭澤遷景州守尋歸以父產業讓於兄

雷轟

按貴州通志轟皋子官北勝州守褻躬清謹動有法則爲後學標準

雷貴

按陝西通志貴高陵人兵起父母逃難失去貴不避鋒鏑得父於鄧得母於終南女觀中張氏姑一子而寡亦失於兵聞在邠地備金往贖養以終身

雷姓部紀事

安慶府志雷續祚崇禎庚午舉於鄉授刑部主事多所平反每臨鞠悽慘形於色時京師有不怕天上有風霾只怕部裏一聲雷之語

欽定古今圖書集成明倫彙編氏族典

第一百九卷目錄

崔姓部彙考

唐書 宰相世系表

白居易長慶集 號州刺史贈禮部尚書崔公墓誌銘

鄭樵通志 以邑為氏

廖用賢尚友錄 崔姓

崔姓部列傳一

商

崔嘉

周

崔瞿

崔杆

崔疆

秦

崔意如

漢

崔廣

崔舒

後漢

崔篆

崔駰

崔烈

崔琦

崔州平

魏

崔琰



崔讚

晉

崔遊

崔廓

崔遇

崔瑜

崔陰

崔適

崔遵

崔彤

宋

崔曠

崔靈和

崔元孫

崔系之

南齊

崔景真

崔文仲

崔恭祖

崔慶緒

崔覺

梁

崔靈恩

崔洪

崔諒

崔悅

崔清

崔懿

崔瓊

崔整

崔譚

崔靈延

崔構

崔祖思

崔慧景

崔懷慎

崔慰祖

崔偃

氏族典第一百九卷

崔姓部彙考

唐書

宰相世系表

崔氏出自姜姓齊丁公伋嫡子季子讓國叔乙食采於崔遂為崔氏濟南東朝陽縣西北有崔氏城是也季子生穆伯穆伯生沃沃生野八世孫天生杆為齊正卿生子成子明子彊皆為慶封所殺子明奔魯生良十五世孫意如為秦大夫封東萊侯二子業仲牟業字伯基漢東萊侯居清河東武城生太常信侯昱昱生襄國太守穆侯紹紹生光祿勳嗣侯雅雅生揚州刺史忠忠生散騎常侍泰泰字世榮始居歙縣二子恪景恪丞相司直生郡功曹殷七子雙邯寓金虎蕃固雙為東祖邯為西祖寓為南祖亦號中祖寓四世孫林字德儒魏司空安陽孝侯會孫悅前趙司徒左長史關內侯二子渾潛湛湛生顗後魏東平府諮議參軍生蔚自宋奔後魏居榮陽號鄭州崔氏許州鄆陵房尉少子或居鄆陵南祖崔氏泰少子景字子成淮陽太守生挺字子建挺生破齒將軍權權生諫諫大夫濟字元先亦稱南祖濟生欽字道初湫生安定侯融字子長融生中書令溫字道和溫生魏常山太守就字伯元就生上谷太守公安公安生晉大司徒關內侯岳字元嵩岳生後趙尚書右僕射牧字伯蘭牧生後趙征東大將軍蔭字道崇蔭生聊城令怡字少業怡生宋樂陵太守曠隨慕容德度河居齊郡烏水號烏水房生清河太守二子靈延靈茂靈茂宋庫部郎中居全節生稚寶

稚寶後魏祠部郎中生遠字景通北齊三公郎中
周司徒長史德仁德仁生君實

伯基八世孫密密二千霸琰霸會孫運

琰字季珪魏尚書生諒字士文生遇遇生瑜瑜生
字叔祖遇生祿祿四世孫

清河大房遇少子諱宋青冀二州刺史生靈和朱員

外散騎常侍生後魏贈清河太守宗伯生休實休號
大房

清河小房寅字敬禮後魏太子舍人樂安郡守生長

謙給事中青州刺史生子令公華

清河青州房琰生欽欽生京京琬琬慕容垂車騎屬

生輯宋泰山太守徙居青州號青州房輯生脩之目

連

博陵安平崔氏仲牟生融融生石石生廓字少通生

寂寂生欽欽生朝漢侍御史生舒漢四郡太守二子

發篆篆郡文學生毅毅生駟字亭伯長岑長二子盤

寔盤生烈後漢太尉城門校尉生均字州平西河太

守十世孫昂

大房崔氏駟少子寔字子真後漢尚書生皓皓生質

質生讚讚生洪字良夫晉大司農生廓廓生邁邁生

懿字世茂五子連現格選殊又三子怡豹偁爲一房

號六房連字景邁鉅鹿令號大房生郡功曹綽二子

標鑒標字洛祖行博陵太守生後魏鎮南長史廣字

仲慶生元飲元飲生當

鑒字神具後魏東徐州刺史安平康侯三子含秉德

習秉德驃騎大將軍諡曰靖穆子忻君哲仲哲
第二房崔氏琨字景龍饒陽令行本郡太守二子經

鬱經生辯字神通後魏武邑太守饒陽侯諡曰恭二
子逸楷

鬱後魏漢陽太守生挺

第三房崔氏格二子蕃穎蕃生天護穎八世孫不疑
左補闕

崔氏定著十房一曰鄭州二曰鄆陵三曰南祖四

曰清河大房五曰清河小房六曰清河青州房七

曰博陵安平房八曰博陵大房九曰博陵第二房

十曰博陵第三房宰相二十三人

鄭州崔氏有元綜鄆陵有知溫南祖有昭緯慎由

引譽神基清河大房有龜從小房有彥昭羣鄆青

州房有圓安平房有仁師混博陵大房有元曄損

鉉元式第二房有珙遠祐甫植第三房有日用

白居易長慶集

號州刺史贈禮部尚書崔公墓誌銘

公諱元亮字晦叔其先出於炎帝至裔孫穆伯受封

於崔因而命氏漢初始分爲清河博陵二祖故其後

稱博陵人

鄭樵通志

以邑爲氏

崔氏姜姓出齊丁公嫡子季子讓國於叔乙食采於

崔遂爲崔氏杜預云濟南東朝陽縣西北有崔氏城

是也季子生穆伯穆伯生沃沃生野八世孫天倍二

十八年晉侯宋公齊國歸父崔天次於城濮天生杵

宣十九年齊惠公卒崔杵有寵於惠公高國畏其偪

也公卒而逐之書曰崔氏出奔衛非其罪也成十七
年齊侯使崔杼爲大夫襄二十三年崔杼弑莊公崔

杼生成及疆後妻生明嫡庶爭立二十七年慶封使
盧蒲絮殺成及疆杼及其妻縊崔明奔魯生良十五

世孫意如爲秦大夫封東萊侯二子伯基仲牟伯基

居清河東武城仲牟居博陵安平並爲著姓

廖用賢尚友錄

崔姓

崔博陵角音又望出清河

崔姓部列傳一

商

崔嘉

按新序申徒狄非其世將自投於河崔嘉聞而止之

周

崔瞿

按莊子崔瞿問於老聃曰不治天下安藏人心

崔天

按左傳僖公二十八年夏四月戊辰晉侯宋公齊國
歸父崔天秦小子憖次於城濮

崔杼

按春秋臣傳杼齊相也是爲崔武子棠公死武子弔

焉見棠姜姜之武子取之莊公通焉杼遂弑之賈舉

州綽祁師公孫叔封具鐸父襄伊僕墮皆死祝佗父

祭於高唐至復命不說弁而死於崔氏申嗣侍漁者

退謂其宰曰爾以帑免我將死其宰曰免是反子之

義也與之皆死崔氏殺饒蔑於平陰丁丑杼立景公

而相之盟國人於大宮太史書曰崔杼弑其君崔子

殺之其弟嗣書而死者二人其弟又書乃舍之南史
開太史盡死執簡以往聞既書乃還

崔成 崔彊 崔明

按左傳襄公二十七年齊崔杼生成及彊而寡娶東
郭姜生明東郭姜以孤人曰棠無咎與東郭偃偃相
氏崔成有疾而廢之而立明成請老於崔崔子許之
偃與無咎弗子曰崔宗邑也必在宗主成與彊怒將
殺之告慶封曰夫子之身亦子所知也唯無咎與偃
是從父兄莫得進矣大恐害夫子敢以告慶封曰子
姑退吾圖之告盧蒲癸盧蒲癸曰彼君之讎也天或
者將棄彼矣彼實家亂子何病焉崔之薄慶之厚也
他日又告慶封曰苟利夫子必去之難吾助女九月
庚辰崔成崔彊殺東郭偃棠無咎於崔氏之朝崔子
怒而出其衆皆逃求入使駕弗得使圍人駕寺人御
而出且曰崔氏有福止余猶可遂見慶封慶封曰崔
慶一也是何敢然請爲子討之使盧蒲癸帥甲以攻
崔氏崔氏堞其宮而守之弗克使國人助之遂滅崔
氏殺成與彊而盡俘其家其妻綰復命於崔子且
御而歸之至則無歸矣乃縊崔明夜辟諸大墓辛巳
崔明來奔慶封當國

秦

崔意如

按鄭樵通志意如爲秦大夫封東萊侯二子伯基仲
牟

漢

崔廣

按尚友錄廣字文通號夏黃公商山四皓之一

崔朝

按後漢書崔駰傳駰高祖父朝昭帝時爲幽州從事
諫刺史無與燕刺王通及刺王敗擢爲侍御史

崔舒

按後漢書崔駰傳朝子舒歷四郡太守所在有能名

崔發

按漢書王莽傳莽爲大司馬涿郡崔發以材能幸莽
居攝爲騎都尉使視符命篡位後封說符侯拜五威
中城將軍立太子拜講樂祭酒後至大司空莽敗降
申屠建建令丞相劉賜斬之以徇

後漢

崔篆

按後漢書崔駰傳舒少子篆王莽時爲郡文學以明
經徵詣公車太保甄豐舉爲步兵校尉篆辭曰吾聞
伐國不問仁人戰陳不訪儒士此舉奚爲至哉遂投
劾歸莽後以篆爲建新大尹篆不得已乃單車到官
稱疾不視事三年不行縣門下掾倪敞諫篆乃強起
班春所至之縣獄圻填滿篆流涕平理所出二千餘
人掾吏叩頭諫篆遂稱疾去建武初朝廷多薦言之
者幽州刺史又舉篆賢良篆自以宗門受莽僞寵慚
愧漢朝遂辭歸不仕

崔殺

按後漢書崔駰傳駰父殺以疾隱身不仕

崔駰

按後漢書崔駰傳駰字亭伯涿郡安平人博學有偉
才善屬文少游太學與班固傳毅同時齊名常以典
籍爲業未遑仕進之事元和中肅宗始修古禮巡狩

方岳駰上四巡頌以稱漢德辭甚典美帝雅好文章
見駰頌謂侍中竇憲曰卿寧知崔駰乎對曰班固數
爲臣說之然未見也帝曰試讀見之駰由此候憲憲
屢展迎門遂揖入爲上客及憲爲車騎將軍駰駰爲
掾憲擅權驕恣駰數諫之及出擊匈奴道路愈多不
法駰爲主簿前後奏記數十指切長短憲不能容稍
疎之因察駰高第出爲長岑長駰自以遠去不得意
遂不之官而歸永元四年卒於家

崔瑗

按後漢書崔駰傳駰子瑗字子玉早孤銳志好學年
十八至京師從侍中賈逵賈正正大義逵善待之瑗因
畱游學遂明天官曆數京房易傳六日七分諸儒宗
之初瑗兄章爲州人所殺手刃報仇因亡命會赦歸
家家貧兄弟同居數十年四十餘始爲郡吏以事
繫東郡發於獄後事釋歸家爲度遼將軍鄧遵所辟
居無何遵被誅瑗免歸復辟車騎將軍閭顯府時閭
太后稱制顯入參政事先是安帝廢太子爲濟陰王
而以北鄉侯爲嗣瑗以侯立不以正知顯將敗欲說
令廢立而顯日沉醉不能得見乃謂長史陳禪欲與
共說白太后禪猶豫未敢從會北鄉侯薨孫程立濟
陰王爲順帝閭顯兄弟悉伏誅瑗坐被斥門生蘇祇
具知瑗謀欲上書言狀瑗聞而遽止之時陳禪爲司
隸校尉召瑗謂曰第聽祇上書禪請爲之證瑗辭歸
不復應州郡命久之大將軍梁商初開幕府復首辟
瑗以疾固辭歲中舉茂才遷汲令視事七年百姓歌
之漢安初大司農胡廣少府竇章共薦瑗宿德大儒
從政有迹由此遷濟北相歲餘光祿大夫杜喬爲八

使徇行郡國以賊罪奏瑗徵詣廷尉瑗上書自訟得理出會病卒年六十六

崔烈

按後漢書崔駰傳駰子瑗瑗子寔寔從兄烈有重名於北州歷位郡守九卿靈帝時開鴻都門榜賣官爵公卿州郡下至黃綬各有差烈時因傳母入錢五百萬得爲司徒於是聲譽衰減從容問其子鈞鈞曰論者嫌其銅臭後拜太尉獻帝初鈞與袁紹俱起兵山東董卓以是收烈付郡獄鈞之卓既誅拜烈城門校尉及李傕入長安爲亂兵所殺

崔寔

按後漢書崔駰傳駰子瑗瑗子寔字子真一名台字元始少沉靜好典籍父卒隱居墓側服竟三公並辟皆不就桓帝初詔公卿郡國舉至孝獨行之士寔以郡舉徵詣公車病不對策除爲郎明於政體吏才有餘其後辟太尉袁湯大將軍梁冀府並不應大司農羊傳少府何劭上書薦寔才美能高召拜議郎遷大將軍冀司馬與邊韶延篤等著作東觀出爲五原太守以病徵拜議郎會梁冀誅寔以故吏免官禁錮數年時鮮卑數犯邊詔三公舉威武謀略之士司空黃瓊薦寔拜遼東太守行道母劉氏病卒上疏求歸葬行喪服竟召拜尚書寔以世方阻亂稱疾不視事數月免歸建寧中病卒

崔琦

按後漢書崔琦傳琦字子璋涿郡安平人濟北相瑗之宗也少游學京師以文章博通稱初舉孝廉爲郎河南尹梁冀聞其才請與交冀行多不軌琦數引古

今成敗以戒之冀不能受乃作外戚箴復作白鵠賦以爲風梁冀見之遣琦歸後除爲臨濟長不敢之職解印綬去冀遂令刺客陰求殺之客見琦耕於陌上懷書一卷息輒偃而誄之客哀其志以實告琦琦得脫走冀後竟捕殺之所著賦頌銘誄箴論九咨七言凡十五篇

崔鈞

按後漢書崔駰傳駰子瑗瑗子寔寔從兄烈烈子鈞爲虎賁中郎將鈞少交結英豪有名稱爲西河太守

崔州平

按蜀志諸葛亮傳亮躬耕隴畝每自比於管仲樂毅時人莫之許也惟博陵崔州平穎川徐庶與亮友善謂爲信然

魏

崔琰

按魏志崔琰傳琰字季珪清河東武城人也就鄭元受學未暮黃巾賊攻北海琰乃歸袁紹聞而辟之以爲騎都尉後紹治兵黎陽琰諫不聽及紹卒二子爭欲得琰琰稱疾固辭由是獲罪幽於圜牆太祖破袁氏辟琰爲別駕從事謂琰曰昨案戶籍可得三十萬衆琰對曰冀方蒸庶暴骨原野未聞王師仁聲先路救其塗炭而校計甲兵斯豈鄙州士女所望於明公哉太祖改容謝之于時賓客皆伏失色太祖征并州留琰傳文帝於鄴太祖爲丞相琰復爲東西曹掾屬魏國初建拜尚書時未立太子臨當侯植有才太祖以函令密訪於外唯琰露板答曰蓋聞春秋之義以長琰以死守之植琰之兄女壻也太祖貴其公亮

喟然嘆息遷中尉琰嘗薦鉅鹿楊訓後太祖爲魏王訓表稱功伐褒述盛德時人或笑訓希世浮僞琰與訓書曰時乎時乎會當有變時琰本意譏論者有白琰此書傲世怨謗太祖怒罰琰爲徒隸使人視之辭色不撓遂賜琰死

崔林

按魏志崔林傳林字德儒清河武城人少時晚成宗族莫知惟從兄琰異之太祖定冀州召除鄆長貧無車馬單步之官太祖征壹關問長吏德政最者并州刺史張陟以林對於是擢爲冀州主簿徙署別駕丞相掾屬魏國既建稍遷御史中丞文帝踐阼拜尚書出爲幽州刺史在官一期寇竊寢息以不事上司左遷河間太守清論多爲林怨遷大鴻臚明帝即位賜爵關內侯轉光祿勳司隸校尉屬郡皆罷非法除過員吏林爲政推誠簡存大體去後每輒見思景初元年司徒司空並缺散騎侍郎孟康薦林後年遂爲司空封安陽亭侯頃之又進封安陽鄉侯正始五年薨諡曰孝侯子述嗣

崔讚

按晉書崔洪傳洪父讚魏吏部尚書左僕射以雅量見稱

晉

崔遊

按晉書崔遊傳遊字子相上黨人少好學儒術甄明恬靖謙退自少及長口未嘗語及財利魏末察孝廉除相府舍人出爲氏池長甚有惠政以病免遂爲廢疾泰始初武帝錄叙文帝故府僚屬就家拜郎中年

七十餘猶敦學不倦撰喪服圖行於世及劉元海僭位命爲御史大夫固辭不就卒於家時年九十三歲

崔洪

按晉書崔洪傳洪字良伯博陵安平人少以清厲顯名武帝世爲御史治書尋爲尚書左丞遷吏部尚書舉用甄明門無私謁洪口不言貨財手不執珠玉楊駿誅洪與都水使者王佑親坐見黜後爲大司農卒於官

崔廓

按晉書崔洪傳洪子廓散騎侍郎亦以正直稱

崔諒

按魏書崔暹傳暹曾祖諒晉中書令

崔遇

按魏書崔暹傳暹祖遇仕石虎爲特進

崔悅

按前秦錄悅仕石虎官至司徒右長史關內侯以才學著稱

崔瑜

按魏書崔暹傳暹父瑜黃門郎

崔清

按前秦錄清仕慕容暉爲黃門侍郎以才學見稱

崔陰

按後燕錄陰字世祿清河東武城人仕垂爲長史章武王宙鎮滑臺以陰爲司馬先是陳留王紹爲征南將軍太原王楷爲征西將軍樂浪王溫爲征東將軍皆以陰爲之參佐陰才幹明敏強正善規諫四王皆嚴憚之所至簡刑法輕賦役流民歸之戶口滋息

崔懿

按後燕錄懿字世茂博陵安平人仕垂位祕書監子連字景遇位鉅鹿令孫綽少孤學行修明有名於世

崔適

按魏書崔暹傳暹兄適字寧祖有名於時慕容垂尚書左丞范陽昌黎二郡太守

崔瓊

按魏書崔元伯傳崔道固祖瓊慕容垂車騎屬

崔遵

按魏書崔元伯傳崔模父遵慕容垂少府卿

崔整

按魏書崔元伯傳模叔父整廣川太守

崔彤

按魏書崔元伯傳清河崔寬祖彤隨晉南陽王保避地隴右遂仕於沮渠李嵩

宋

崔曠

按魏書崔光傳光祖曠從慕容德南渡河居青州之時水慕容氏滅仕劉義隆爲樂陵太守

崔諲

按魏書崔暹傳暹子諲劉義隆以爲冀州刺史

崔靈和

按魏書崔休傳休祖靈和仕劉義隆爲員外散騎侍郎

崔靈延

按魏書崔光傳光父靈延劉駿龍驤將軍長廣太守

崔元孫

按魏書崔亮傳亮父元孫劉駿尚書郎劉或之僭立也或青州刺史沈文秀阻兵叛之或使元孫討文秀爲文秀所害

崔構

按南齊書崔慧景傳慧景祖構奉朝請

崔系之

按南齊書崔慧景傳慧景父系之州別駕

南齊

崔景真

按南史崔祖思傳祖思叔父景真位平昌太守有惠政去任之日土人思之爲立祠

崔祖思

按南齊書崔祖思傳祖思字敬元清河東武城人崔琰七世孫也父僧護州秀才祖思初辟主簿太祖在淮陰聞風自結爲上輔國主簿甚見親待參豫謀議建元元年轉長兼給事黃門侍郎上初卽位祖思啓陳政事上優詔報答尋遷寧朔將軍領齊郡太守是冬魏動遷冠軍將軍軍主屯淮上二年進號征南將軍仍遷假節督青冀二州刺史少時卒

崔文仲

按南齊書崔祖思傳祖思宗人文仲初辟州從事泰始初爲薛安都平北主簿拔難歸國元徽初從太祖於新亭拒桂陽賊著誠効除游擊將軍沈攸之年起助豫章王鎮東府歷驃騎諮議出爲徐州刺史建元初封建陽縣子除黃門郎領越騎校尉改封隨縣未明元年爲太子左率累至征南將軍冠軍司馬汝陰太守四年卒

崔慧景

按南齊書崔慧景傳慧景字君山清河東武城人初爲國子學生宋泰始中歷位員外郎稍遷長水校尉寧朔將軍太祖在淮陰慧景與宗人祖思同時自結除前軍沈攸之事平出爲武陵王安西司馬河東太守昇明三年豫章王爲荊州慧景留爲鎮西司馬兼諮議太祖受禪封樂安縣子轉平西府司馬南郡內史仍遷南蠻長史加輔國將軍建元元年梁州賊李烏奴未平以慧景爲持節都督梁南北秦沙四州軍事西戎校尉梁南秦二州刺史世祖即位進號冠軍將軍永明三年以本號還遷黃門郎領羽林監明年遷隨王東中郎司馬加輔國將軍出爲持節督司州軍事冠軍將軍司州刺史母喪詔起復本任九年徵還轉太子左率加通直常侍明年遷右衛將軍加給事中是時魏將南侵上出慧景爲持節督豫州郢州之西陽司州之汝南二郡諸軍事冠軍將軍豫州刺史鬱林即位進號征南將軍慧景以少主新立密與魏交通朝廷疑懼高宗輔政慧景遣密啓送誠勸進徵還爲散騎常侍左衛將軍建武二年加冠軍將軍四年遷度支尚書領太子左率永泰元年加慧景平北將軍置佐史分軍助戍樊城東昏即位改領右衛將軍未拜永元元年還護軍將軍尋加侍中陳顯達反加慧景平南將軍都督衆軍事帝既誅戮將相舊臣皆盡慧景自以年宿位重轉不自安明年裴叔業以壽春降魏改授慧景平西將軍軍水路征壽陽慧景既得出其喜子覺爲直閣將軍慧景密與期覺便出奔慧景回軍還廣陵便收衆濟江集京口臺軍

望風退走慧景引軍入樂遊苑宮門皆閉慧景引衆圍之稱宣德太后令廢帝爲吳王先是衛尉蕭懿自歷陽步道征壽陽帝遣密使告之懿率軍自采石濟岸子覺進戰大敗慧景乃將腹心數人潛去衆於道稍散單馬至蟹浦爲漁父所斬以頭內鮓魚籃擔送至京師時年六十三

崔恭祖

按南齊書崔慧景傳恭祖者慧景宗人驍果便馬稍氣力絕人頻經軍陣討王敬則功封二百戶慧景平後恭祖繫尚方少時殺之

崔懷慎

按南齊書崔懷慎傳懷慎清河東武城人也父邪利魯郡太守宋元嘉中沒魏懷慎與妻房氏篤愛聞父陷沒即日遺妻布衣蔬食如居喪禮邪利後仕魏中書戒懷慎不許如此懷慎得書更號泣懷慎從叔模沒魏模子雖居處改節而不廢婚宦大明中懷慎宗人冀州刺史元孫北使魏問之曰崔邪利模竝力屈歸命二家子姪出處不同義將安在元孫曰王尊驅驢王陽回車欲令忠孝竝弘臣子兩節太始初淮北陷沒界上流奔者多有去就懷慎因此入北至桑乾邪利時已卒懷慎絕而後蘇載喪還青州徒跣冰雪土氣寒酷而手足不傷時人以爲孝感感喪畢以弟在南建元初又逃歸而弟亦已亡懷慎孤貧獨立宗黨哀之斂給其升米永明中卒

崔慶緒

按南齊書崔慰祖傳慰祖父慶緒永明中梁州刺史崔慰祖

按南齊書崔慰祖傳慰祖字悅宗清河東武城人也解褐奉朝請父喪不食鹽母曰汝既無兄弟又未有子嗣毀不減性政當不進有羞耳如何絕鹽吾今亦不食矣慰祖不得已從之家財千萬散與宗族漆器題爲日字日字之器流乎遠近料得父時假貴文疏謂族子紘曰彼有自當見還彼無吾何言故悉火焚之好學聚書至萬卷鄉里年少好事者來從假借日數十表慰祖親自取與未嘗爲辭爲始安王撫軍墨曹行參軍轉刑獄兼記室建武中詔舉士從兄慧景舉慰祖碩學帝欲試以百里慰祖辭不就與丹陽丞劉渢素善遙光據東府反慰祖在城內城未潰一日渢謂之曰卿有老母宜其出矣命門者出之慰祖詣闕自首繫尚方病卒年三十五

崔覺

按南齊書崔慧景傳慧景子覺亡命爲道人見執伏法

崔偃

按南齊書崔慧景傳覺弟偃爲始安內史藏竄得免和帝西臺立以爲寧朔將軍尋下獄死

梁

崔靈恩

按梁書崔靈恩傳靈恩清河武城人也少篤學從師徧通五經尤精三禮三傳先在北仕爲太常博士天監十三年歸國高祖以其儒術擢拜員外散騎侍郎累遷步兵校尉兼國子博士靈恩聚徒講授聽者常數百人性拙朴無風采及解經析理甚有精致京師舊儒咸稱重之助教孔奐尤好其學靈恩先習左傳

服解不爲江東所行及改說杜義每文句常申服以
難杜遂著左氏條義以明之時有助教虞僧誕又精
杜學因作申杜難服以答靈恩世竝行焉先是儒者
論天五執渾蓋二義論蓋不合於渾論渾不合於蓋
靈恩立義以渾蓋爲一焉出爲長沙內史還除國子
博士講衆尤盛出爲明威將軍桂州刺史卒官靈恩
集注毛詩二十二卷集注周禮四十卷制三禮義宗
四十七卷左氏經傳義二十二卷左氏條例十卷公
羊穀梁文句義十卷